

BATAKURU PUULUSA ARANURU HAA E BE TESALONII BEN

1 ¹Immorde e an min Puulusa, wondude e Silaasi e Timotee, haa e ngal *moftal wongal Tesalonii, humondirbe e Alla Baabaajo on e Iisaa Almasiihu Joomi on. Yo moyfere e buttu wonan on.

Fii Anditangol ɓe Tesalonii ɓen Gomdinal mabbe ngal

² Meden duumii e jarnugol Alla fii mon on fow, e meden anditude fii mon on fow e nder torndeeji amen din. ³ Meden anditude soono woo yeeso Alla, on Ben men, kuude gomdinal mon ngal e golle giggol mon ngol e tama'u mo catordon e Iisaa Almasiihu Joomi men on. ⁴ Meden andi, yo musibbe ɓe Alla yidi, ko on subaabé, ⁵ ko fii Kibaaru Moyyo mo men woni fejninde on, men addiranaali on mo kongol tun, kono ko wondude e bawgal e *RuuHu Seniido on e hoolaare mawnde. E hidon andi-le no men wondirnoo e mon fii nafa mon. ⁶ Onon kadi on njembii men, on njembii Joomi on. Hay e nder tampereeji monduududi din, on jabirii daaluyee on weltaare iwrunde e Ruuhu Seniido on. ⁷ Kodun wadi, on wonii ɓe gomdinbe ɓen Masedonii e Akaaya fow njembinta. ⁸ Ko fii daaluyee Joomiraado on lollirii immorde ka mon, hinaa non e hoore Masedonii e Akaaya tun, kono gomdinal mon ngal e Alla andike nokkeeli din fow, haa ka tawata hewtaa ka men wowla fii mun. ⁹ No sifeede fii jabbo ngo men jabbaa ka mon ngon, e ko honno tuubirandon Alla, yiltidon e baawo sanamuaji fii rewugol Alla Wuurudo Goongaajo on, ¹⁰ e fii habbagol ka kammuuli on Biddo makko, mo o immintini e hakkunde maybe ɓen, dun ko Iisaa, on Jattindo en tikkere aroyaynde nden.

Fii Golle Puulusa den e hakkunde ɓe Tesalonii ɓen

2 ¹Hidon andi onon tigi, yo musibbe, ardu amen ndun ka mon wonaali meerenteeru. ²Kono ɓawto men tampude, men tampinee e ndee saare wi'eteende Filipii, wano andirdon non, men yetti hoolaare e Alla men on fii fejjinangol on Kibaaru Moyyo Alla on e nder tippiro mawngo. ³E hoore d'un, waajuuij amendin hinaa e palji iwri, maa e anniyeji bondi, maa e yoyre, ⁴kono ɓay Alla tawii meden foddi e halfineede Kibaaru Moyyo on, ko d'un wadi si men yewtirtaa no welirta yimbe ɓen, kono ko no welirta Alla, on ndarndotoodo berde amen den. ⁵E hoore d'un, hidon andi men dayniraali on mantirgol kongudi, miile kadi ardaaki men, Alla ko seedee e d'un. ⁶E men dabbaali kadi yo yimbe ɓen teddin men, woni onon, woni heddiibe ɓen. ⁷Hay si men waawayno hollude on mbawdi sabu ko men *sahaabaabe *Almasiihu on, men wadaali d'un. Kono fewndo men wondi e mon, men holli on newaare, wano neene dankorta ɓibbe mun. ⁸E nder giggol ngol men joganii on ngol, meden yidunoo yedugol on Kibaaru Moyyo Alla on, kono kadi ngurndan amen dan tigi, hakkee ko men yidi on. ⁹Onon on anditii, yo musibbe, golle amen den e yangi amen kin fewndo men fejjinannoo on Kibaaru Moyyo Alla on, men gollirno jemma e jalorma, fii wota men wonan hay gooto e mon dongal.

¹⁰Ko on seedee, Alla kadi ko seedee, men wonirno e noone laabudo e no feewiri e no felnoraal telen-ma mon, onon gomdinbe ɓen. ¹¹Hidon andi kadi men woniranno kala e mon wano baaba woniranta faybe mun. ¹²Men waajino on, men wakkilini on, men jeeji on yo on wuuir noone no welirta Alla, on Noddudo on ka *laamateeri mun e ka mangu mun.

¹³E hino ko men duumori e jarnugol Alla kon: e nder jabugol mon daaluyee mo men fejjinannoo on on, on jabiraano mo wa iwrudo e neddanke, kono on jabisno mo wa daaluyee Alla, no o woniri haqiiqa non, ko on daaluyee woni gollude e

mon onon gomdinbe ben.¹⁴ On banginnodun, yo musibbe, e nder nembugol mon *mofte Alla wonde ka diwal Yahuuda den, de tawata ko Iisaa Almasiihu on jeyi, ko fii onon kadi on tampuno e juude nokondoobe mon ben sifa tampereeji dī *Yahuudiyankeeben tampinnoo den mofte din.¹⁵ Koben wari Iisaa Joomi on, wari annabaabe ben, cukkii men, dun ko ben be welataa Alla, wonbe aybe yimbe ben fow.¹⁶ Hibe fanni men yewtugol be wonaa Yahuudiyanke ben fii wota ben dande, ko nii be jokkiri hebbingol junuubaaji maabbe din. Kono tikkere Alla nden sakkitori nangugol be.

Fii no Puulusa Nuliri Timotee

¹⁷ Menen, telen-ma amen yo musibbe, e nder ko men seedunoo e mon kon e nder saa'ihun e bandu, kono hinaa e bernde, hakkee ko men marnoo faale tiidudo fii yi'itugol on, men etino fii dun fota.¹⁸ Kodun wadi si men faalano yahude ka mon, tentinii min Puulusa, mi etino dun buri nde wootere. Kono Ibuliisa hanni men.¹⁹ E hara hinaa onon woni tama'u amen on e weltaare amen nden e *meetelol darja amen on yeeso Iisaa Joomi men on jnande ardu makko ndun?²⁰ Hiiyii, ko onon woni darja amen on e weltaare amen nden!

3 ¹Kodun wadi si men wawtaano hande kadi habbagol ko buri nii, men tawi no burani men ka men wona menen tun ka saare Atiina, ²men imminana on oo musiddo amen inneteedo Timotee, on wondiddo amen e nder golle Alla den e hoore fejningol Kibaaru Moyyo *Almasiihu on. Men fawi mo tiidingol on e wakkilingol on ka gomfinal mon,³ fii wota hay gooto dilline e nder tampereeji fewndiidi din. Ko fii onon tigi hidon andi ko dun muuyanaden.⁴ Fewndo ko men wonnoo takko mon, men wowlanayno on wonde en hebay satteendeeji, ko dun woni ko hewti, hidon andi.⁵ Kodun wadi, bay mi waawataano habbaade hande kadi, mi imminii Timotee fii humpitagol gomfinal mon ngal, mido hulunoo wota taw no gasa hara jarribotoodo on faljinii on, tawa golle amen den wonii meere.

⁶ Awa Timotee ko e hewtitude woni ka amen iwrude ka mon, o addoranii men kibaaru moyyo fii gomdinal mon ngal e giggol mon ngol. O innii men, tigi-tigi on, hidon joganii men maande moyyere, awa kadi hidon himmani yi'ugol men, wano men himmirani yi'ugol on non. ⁷ E hoore dün, e nder satteende amen nden fow e tampere amen nden, yo musibbe, men wakkilinaama sabu gomdinal mon ngal.

⁸ Jooni non hiden wuuri, ko fii hidon tabiti few e Joomiraado on. ⁹ E hara ko honno men waawata jarnirde Alla fii mon, fii ndee weltaare nde weltindon men yeeso makko fow? ¹⁰ Kodun wadi, jemma e nalorma meden toraade mo e nder tentingol fii yo o newnan men yi'itugol on, timmintina ko ɣakki e gomdinal mon ngal kon.

¹¹ Yo Alla Ben men on tigi, e Iisaa Joomi men on, udditan men laawol haa ka mon. ¹² Awa kadi yo Joomiraado on hebbin giggol hakkundeeji mon haa feyýita, e telen-ma yimbe ben fow, hara kadi ko sifa giggol ngol men joganii on ngol. ¹³ Yo o tabintinir nii berde monden fii no woniron laabube e ɓe felnaaki yeeso Alla Baabaajo men on, ka jalaande nde Iisaa Joomi men on aroyta e mun wondude e laabube mun ɓen fow.

Fii Wuurigol no Welirta Alla

4 ¹ Ka rawnoode, yo musibbe, on andirii men ko honno gasirton wonirde fii no weliron Alla, e hin-le ko non wonirdon. Jooni men torike on, men jeejii, sabu humondiral men e Iisaa Joomi on, beydee yaarude yeeso soono woo e d'en banje. ² Ko fii hidon andi janndeeji di men janni on din immorde e Iisaa Joomi on. ³ Ko Alla faalaa ko yo on laato laabube, e fii yo on woddito jinaa, ⁴ e yo mo kala e mon waawu jogitaade ɓandu mun ndun e nder laabal e teddungal, ⁵ e ɓaawo accugol faaleeji wonkii foola dün, wano ɓe gomdinaa andaa Alla ɓen gerdata non. ⁶ E telen-ma dün, wota hay gooto bonnu musiddo mun maa huutora mo yoyre, ko fii Joomiraado on yobay sifa din noone ellaaji fow. Hari men wowlaniino on dun, men hajike on e dun. ⁷ Ko fii Alla noddiraali en wuuringol angal laabal, kono ko

wuurigol laabal.⁸ Kodun wadi, on bugitiido ngal gandal, haray hinaa neddo o bugitii, kono ko Alla, on Yedudo on *Ruuhu mun Seniido on.

⁹ E telen-ma giggol siddsankaaku musibbe gomdinbe ben, on hatonjinaa e windaneede fii dun, ko fii Alla tigi wawnii on yidindirgol.¹⁰ Kodun kadi wondon wadude e fee musibbe men ben fow e nder Masedonii no didori, kono men wakkilinii on, yo musibbe, beydugol kadi.¹¹ Himmanon wuurigol buttu, jokkon haajuuji mondin tigi, golliron juude mon den, wano men yamiriri on non.¹² Dun ko fii no woniron feewube e telen-ma be gomdinaa ben, hara on wonataa dongal hay gooto.

Fii Artugol Iisaa

¹³ Men faalaaka, yo musibbe, yo on ronku andude fii maybe ben, fii wota on hebu sokola, wano beya be alaa tama'u ben.¹⁴ Kodun wadi, bay hidé gomdini Iisaa maayii, awa kadi o immintinaama, hidé gomdini kadi Alla artiray maayube no gomdini Iisaa ben wondude e makko.¹⁵ Awa e hino ko men wi'ata on, dun non ko e kongol Joomi on iwri: enen wurbe ben, luttitube haa nande ardu Joomi on, en adotaako maybe ben artireede.¹⁶ Ko fii, Joomi on tigi iwray ka kammu, tippoda e yamiroore ewnaande e hawa malaa'ikaajo mawso e hito *liital Alla ngal. Onsay ko maayube no gomdini *Almasiihu on ben adetee immintineede.¹⁷ Bawto dun, enen wurbe luttitaybe ben, en yettidete e mabbe ka nder duule, fii fottoygol e Joomi on ka weeyo. Onsay en wonday e Joomi on haa poomaa.¹⁸ Awa wakkilindiree rewruude e dii kongudi.

5 ¹ Fii nalaade den e saa'iiji din, on hatonjinaa e windaneede fii dun, yo musibbe.² Ko fii onon tigi hidon andi few nalaande Joomi on arday wa nde ngujjo no ara jemma.³ Nde yimbe wi'i: «Buttu ngun tabitii, tawa kadi masiibo alaa!», ko onsay halakuyee on arata heja, yana e mabbe wa nde ijata fidi debbo reedujo, hara be dadataa-le few.

⁴Kono onon, yo musibbe, on alaa e nder niwre nden haa ka nden nalaande juhira on wa ngujjo. ⁵On fow ko on bibbe ndaygu ngun e bibbe nalorma on. Hinaa en be jemma on maa niwre nden.⁶Awa, wota en daanor wabeya, kono wattanen yiila, wonen hakkilanbe. ⁷Daanotoobe ben daanoto jemma, mandiloobe ben ko jemma mandilirta. ⁸Kono enen yimbe nalorma ben, wonen hakkilanbe, bornoden hiwitorgo gomdinal ngal e giggol ngol, hippoden kunnawal tama'u kisiyee on. ⁹Ko fii Alla muuyanaali en tikkere makko nden, kono ko fii no hebiren kisiyee rewrude e Iisaa Almasiihu Joomi men on, ¹⁰on maydo fii men, fii, woni hidien daanii, woni en daanaaki, no wuuridiren e makko. ¹¹Awa, wakkilindiree, tiifindiron, wano wondon warrude non fewndo doo.

Fii Yamirooje Sakkitore den e Salminaango ngon

¹²Men torike on, yo musibbe, anditanee wonbe gollude hakkunde monben, ben be Joomiraado on subii ko ardo on, hajoo on. ¹³Joganodon be teddungal tiidungal e giggol, sabu kuude mabbe den. Yo buttu wonu hakkunde mon. ¹⁴Men yamirii on, yo musibbe, hajee puybe ben, wakkilinon aamitube ben, wallitodon lo'ube ben, wonon mujniibe e fee wondo woo. ¹⁵Wattanon yiila fii wota hay gooto yobir bone bone, kono wadee soono woo ko moyyi, woni non ko e hakkunde mon, woni e telen-ma wondo woo.

¹⁶Wonee saa'i kala weltiibe, ¹⁷duumodon e toragol, ¹⁸jarnee Alla e fee kala ko woni, ko fii ko dun woni faale Alla on fii mon, onon bee humondirbe e Iisaa Almasiihu on.

¹⁹Wota on faadinan Ruuhu Allaahu on.²⁰Wota on hayfin kongudi di Alla longini gomdinbe ben, ²¹kono taskee kala huunde, jogitodon ko moyyi kon. ²²Reenodon e bone, noone woo no o wa'i.

²³Yo Alla Jom Buttu on wadu on yimbe makko ko timmi, e yo o reenu on e banjeeji din fow, dun ko ruuhu mon on e wonkii mon kin e bandu mon ndun, fii

wota on wonu felniibe nande ardu Iisaa Almasiihu Joomi men on.²⁴ Ko fii on Noddudo on ko Sella-Findeejo, awa kadi ko on woni Timminoyoowo dun fow.

²⁵ Musibbe, awa toranee men menen kadi.²⁶ Salminiree musibbe ben fow hirbondiral laabungal.²⁷ Mi torike on e innde Joomi on: yo musibbe ben fow jangu nduu batakuru.

²⁸ Yo moyere Iisaa Almasiihu Joomi men on wonu e mon.

PREMIÈRE ÉPÎTRE DE PAUL AUX THESSALONICIENS

en Langue Pular (Fouta-Jalon)

République de Guinée

© 2013 Traducteurs Pionniers de la Bible

en collaboration avec

Mission Protestante Réformée